



08.05.2023

UPA2023/148  
Paneeraq Olsen, Naleraq

**Angajoqqaat erninermi sulinnigiffeqarnerup naammassereersimanerani paarsisussarsisi-mannigtsunut pisortat qanoq ikiorsiisinnaaneranut tunngasumik, siunnersuummik saqqummiussisussamik, suleqatigiissitaq nalunaarummik suliaqartussamik pileritsisoqarnissaanik Naalackersuisut peqquneqassasut Inatsisartunut aalajangiiffigissassatut siunnersuut. Nalunaarusiami siunnersuut aallaavigalugu pisortanut aningaasatigut suut kingunissaanersut ila-assapput. Suleqatigiissitaq innersuussutini kingusinnerpaamik 1. Januar 2024 saqqummiutereersimassavaat.**

(Demokraatit Inatsisartutgruppia)

### **Oqaaseqaat:**

Naleqqaminngaanit siunnersuuteqartut tassalu Demokraatit Inatsisartut gruppiat siunnersuuteqarnerannut qujarusuppugut.

Aalajangiiffigissassatut siunnersuut soqutiginarpoq peqqutigalugu Nunarput tamakkerlugu ukiumi kingullerni tallimani arnat ernisimallutik erninermusiaqartut ukiumut 831-it 860-illu akornanni amerlassuseqarmata. Tamanna takuneqarsinnaavoq uanga Naalackersuisunut erninermi sulinnigiffeqartarneq pillugu § 37 naapertorlugu apeqqutiginiikuusanik akineqarnikuusorlu ulloq 24. januar 2023-imi<sup>1</sup>.

Naalackersuisup akissuteqaammuni oqariartuutigaa ”*Meeqqanut ulluunerani neqeroorutininik qularnaarinissaq kommunit akisussaaffigaat*”. Aammalu akissuteqaataata ilaani atuarneqarsinnaalluni ”*Kommunit ilaanni naammattumik amerlassusilinnik meeqqanut ulluunerani neqerooruteqarpoq, kommuninili allani meeqqanut ulluunerani neqeroorutit amigarsinnaasarlutik*” kiisalu ”*Akisussaaffimmik taassuminnga kivitsinissaq pillugu Naalackersuisut kommuninik oqaloqateqarput.*”

Aap inatsisit malillugu kommunit meeqqanut ulluunerani neqerooruteqartitsisussaasut Naleqqamiit ilisimalluarparput. Kisianni uagut Inatsisartuusugut pisussaaffigaarput inatsisinik sinaakkuteqartitsinerput aamma atuisunit malinneqarnerisooq qulakkiissallugu. Taamaattumik Naleqqaminngaanit isumaqarpugut aalajangiiffigissassatut siunnersuummi ajornartorsiut qaqinneqartoq qanoq annertutiginersooq misissorneqartariaqartoq, isumaqaratta naammanngitsoq oqaannassalluni kommunit akisussaaffigaat. Qinikkatut akisussaqaataavugut.

Aamma qaqinneqarsinaasut arlalinnik sammiveqarsinnaapput. Meeqqanut ulluunerani neqeroorutit kommunikkaarlugu qanoq amerlatigaat, qanoq utaqquisuuteqartigaat, meeqqerivilortitsinissaminnut

---

<sup>1</sup> [https://ina.gl/documents/para3637/2022/svar/230\\_2022\\_barsel\\_PANERO\\_akissut.pdf](https://ina.gl/documents/para3637/2022/svar/230_2022_barsel_PANERO_akissut.pdf)



# Naleraq

anigaasanik naammattunik peqarpaat, minnerunngitsumillu sulisoqarnikkut qanoq inissisimappat. Naluneqanngitsut perorsaasut amigaataasorujussuupput akissarsiaat suliaannut akisussaaffiannullu naleqqutinngitsumik inissisimapput. Suunuku peqqutaaqataasut Meeqqanut ullunerani neqeroorutit amigaatigineqarsimappata?

Iliuseqarniarta innuttaasunik amigaatigineqartut qanoq iliuseqarfigalugit.

Taamaattumik Naleqqaminngaani isumaqarpugut siunnersuut itigartiinnarnagu Inatsisartut Ilaquta-riinnermut Peqqissutsimullu Ataatsimiititaliaanut eqqartugassanngorlugu misissorneqartussanngor-  
lugu ingerlatinneqartariaqartoq.